



PM Modi-i United Kingdom aser
Maldives na semdangtsü

Venus Williams DC Open
nung asayatsü



AYO-i Nagaland Motor Transport Policy yanglutsü akhanger

Kohima, Chiteni/July 20 (TYO): Regional Transport Authority (RTO) ajanga taxi permit agütsüba nung tim masüba mapa inyakba putetba sülen Angami Youth Organisation (AYO) ajanga tekeraba nung Nagaland Motor Transport Policy ka yanglutsü tayongzükba agütsüogo.

Kohima nung Honibarnü osangbener senden ka nung jembidang, AYO ajanga Old Minister's Hill nung June 24 nungi yashi tashi (anogo 12) taxi verification drive agiba mapang local aser zonal taxi 2,412 jangiatepa AYO stickers agütsü, ta AYO tir Kesosul Christopher Ltu-i ashi.

AYO Taxi Verification Drive committee züngsem Vipu Zashümo-ia iba verification process mapang nisung kati permit ka dak tali bena aliba, küm 20 dak tema documents renew masüba, tanur nem permits agütsüba, nokdanga aliba nung aibelen "backdoor" nungi permit agütsüba densema tim masüba balala inyakba putet, ta ashi.

"Taxi permits ya shidakbo zünger mapa mangu aliba lanurtem asoshi lir, saka ozüng agi memelai ayoker. Nisung karibo permit ka atema sen 95,000 tashi agütsüba lir, anungji iba yagi department telungzük nung ochimashi mapa inyakba sayur," ta pai ashi.

Taxi permits tasen magütsütsü sorkari July 6, 2022 nü totuyuba agüja liaka, iba tenokdangba agütsüba sülen permits 577 agütsüba AYO-i ngutet, ta Zashümo-i ashi.

"Onoki 2024 nung RTO dangi RTI meshi saka parnoki telangzüba agütsüba nung temulung masüba yong onok sasa iba verification mapa inyaksüsa akum," ta pai ashi.

Tang Kohima telungzük nung taxi 3,000 dak tema amshitar, aser ibai yimti tila

asoshi onsara lir, ta AYO ajanga ashi.

Taxi 2,412 verify asüba nungi first-time ownership kübok taxi 843 aser second nungi fifth ownerships nung 1,569 lir, ta Committee züngsem Megokolie Pier-i ashi.

Lisapur masüba nisungtem meyong taxi 415 lir aser permit ana tanur nem agütsü, aser nisung kati permits ti tashi bena aliba ngutet, ta pai ashi.

July 2022 sülen permit tasen sorkari nokdanga liaka registration number NL01TA 0703 nungi tenzüka taxi 448 lir ta ashi.

Taxi aika documentation shidak mali, aika permits mapang tembanger, aser shidak agi taxi permit ya küm pongu atema dang süaka kar küm 20 dak tema renew masü amshiba AYO ajanga tuteta ashi.

"State yimtiba nung civil society organisation ka ama public transport system tajungba nung amshidaksütsü asen mapa ama bilemer," ta Ltu-i ashi.

Iba ama aibelen azüoktsü aser system nung ochishia inyaksü mechi state atema temeja Motor Transport Policy yangluang ta ajungshia Chief Secretary, RTO Chairman aser state sorkar dangi tezüluba agütsütsü, ta AYO ajanga ashi.

Verification process tembangba sülen parnoki Kohima nung tesem balala nung aliba taxi stands tem meita aoba mapang AYO Verified sticker aser All Nagaland Taxi Association (ANTA) ajanga agütsüba Identity Card mali taxi aika amshiba putet, ta AYO tiri ashi.

Iba dak sendakba nung tang nungi tenzüka verify masüba taxi tem AYO jurisdiction kübok senzütsü memelatsü aser senzüsemponger tem dang verified taxi tem amshitsü ayongzüker, ta paisa ashi.

Dimapur nung surveillance mapa asangsang akumtsü

Dimapur, Chiteni/July 20 (TYO): Security ya nübur ajungai lungjemer inyakba nung lir aser NGOs, civil societies aser BAN tejakleni arua pilot project tasen takok ngua inyaksüla, ta Director General of Police, Nagaland, Rubin Sharma, IPS ajanga ashi.

Honibarnü Chümoukedima nung Business Association of Nagas (BAN) ajanga Deputy Commissioner, Dimapur aser Commissioner of Police, Dimapur den lungjemer "Securing Dimapur: A Joint Endeavour" omen nung ajemdaker Dimapur nung surveillance implementation atema sentong ka ayongzükba nung jembidang DGP Nagaland, Rubin Sharma-i iba o ya ashi.

Iba surveillance tasenba dang Automatic Number Plate Reading Cameras ta ajar, kong Artificial Intelligence (AI) keta lir aser iba yagi police temi gari aser aibelenertem tekeraba nung jangjatetsü, ta Sharma-i ashi.

Dimapur kisüng atema surveillance cameras tajemba agi 10,000 bo nüngdaksü, aser

tang aliba sorkari yamaji nüngdakba ajak magütsütetsü, ta ashi.

Iba atema nüburtem aser associations shilem agütsü nüngdaker aser iba project atema police department-i danga department ishika dangbo asüngdanga lir, ta pai ashi.

Surveillance system ya tawabangba ka kübok lungjemtsü tongtipang lir ta DGP-i ashi aser nübur ajunga dang talisa Dimapur yimti asoshi CCTV cameras aliba nung yariteptsü ayongzüka liasü.

Terenlok tamendak dakji nüburtem kumzüka ayuba ya lir, aser iba senden ya surveillance system mapa kuma amshiba ajanga yimti tekumkumba, tetsübo maliba kumdaksütsü asoshi mera ka lir, ta BAN tiri ashi.

DIG CID ajanga iba pilot project indang live demo ka sayudang, surveillance system tasenba ya Transport department den lokteptsü, kong gari kibur indang registration numbers, contact numbers, driving licence aser gari indang

osang ajak itangjisa putettsü.

Iba senden nung Dimapur asoshi City Surveillance Implementation Project ya renem, koba ajanga commercial districts, traffic intersections, municipal service corridors, public transport hub, government installations aser jila nung tongtipang tesemtem ayimjemtsü.

Iba project ya Public-Private Partnership (PPP) model kübok inyaksü sentong lir, kong private sector capital, technology aser operational expertise tem public sector governance, ozüng aser mangdang tajung kubok mapa kuma inyaksü.

Maneni Multi-Stakeholder Task Force ka amenoktsü iba senden nung pangzüng yanglua liasü, kong Home Department aser Police Department, Urban Development aser Power Departments, Deputy Commissioner's Office, Municipal Body, Industry Body aser Civil Society nungi teshimtet nübu alitsü aser iba project ya anogo 15 nung inyaksü mapang atakzüka ayu.

Miim osang temai adokba ken o nung Nagaland police SI nem bail agütsü

Dimapur, Chiteni/July 20 (TYO): Gauhati High Court indang Kohima Bench ajanga Nagaland Police nung sub-inspector (SI), Katovi Zhimomi nem anticipatory bail agütsüogo, shiba miim osang temai adoktsü ta ken o benoka lir.

Iba ken o ya May 23 nü Chümoukedima district kübok Unity village nung injang khashiba dak sendaka lir.

Justice Shamima Jahan ajanga taoba hopta totuyuba ka agütsüba nung Zhimomi nem mezüng interim bail ya June 27 nü agütsü aser iba sülen bushisüngdangba nung pai kanga junga amalitep akar, ta ashi.

Iba amalitep akaba nungya asüngdangyaba langzütsü asoshi aiben aruba aser Chief Judicial Magistrate (CJM), Dimapur matsüngdang voice sample collection asütsü mulungba dena lir.

Iba ken o ya Diphupar Police Station nung FIR ka benokba nungi tenzüka ta court indang record ajanga ashir. Iba FIR ya Bharatiya Nagarika Suraksha Sanhita (BNSS), 2023 indang sections balala aser Official Secrets Act kübok benok.

Iba ken o ya June 17, 2025 nü FIR benokba nung

ajemdaker lir, kong Diphupar PS Case No. 0033/2025 dak sendakba mobile phone number ka meitba mapang ken o nung tai tonglokja alisang ya Zhimomi den contact aliba ngutet.

"FIR nungsa petition agütsür, shiba police ka lir, pa yagi tai tonglokja alir metdong aputsü merangba nungi jenbudaksütsü mechi tongtipang osangtsüsang temai adoktsüba ta shia lir. Anungji petitioner ya criminal conspiracy inyakba aser danga mapa tamajung ken o benoktsüsa aibelenba ngutet," ta court totuyuba nung shia lir.

Iba yongji Diphupar PS Case No. 0040/2025 ya benok.

Shidakba ken o (Diphupar PS Case No. 0033/2025) ya May 23 nü Unity village nung injang khashiba dak sendakba lir.

Iba ken o nung tai tonglokja aliba nung yaritsüsa kuli mali ta Zhimomi asoshi okatsüri ashi. Okatsürisa pa indang client-i bushisüngdangba mapang amalitep akaba aser tongtipang osang temai adoktsüba indang kuli maka ta ashi.

Okatsürisa Zhimomi ya CJM, Dimapur nem voice sample agütsütsü asoshi mulungsoa July 9, 2025 nü ao ta ashi.

Ken o jembiba mapang

public prosecutor-i bail agütsütsü memulung aser Zhimomi-i Unity village nung injang khashiba ken o nung metdong kinungtsü den phone ajanga jembiba kuli agütsü.

Prosecutor-i case diary agütsüba nung Zhimomi-i metdong kinungtsü den pezüben jembiba sayu aser tai tonglokja alisangia aji shidak ta nangzük.

Item kuli liaka phone ajanga jembidang miim osang lemsatepba kuli tejangja mali ta court-i angatet.

Tai tonglokja alisang'er kidangi Zhimomi aodang pa meina aoba tetsür constable yagi aibelen mapa inyak ta tejangja meshitet, kechiaser parnok ya par oshi nung jembi aser lai parnok oshi mangatet ta obendangeri ashi.

Zhimomi-i iba ken o nung amalitep akaba, June 27, June 28, June 30, aser July 2, 2025 nung okadaki aruba aser July 9, 2025 nü voice sample collection atema pai mulungba indang Justice Jahan-i ashi.

Zhimomi-i amalitep akaba aser kuli tejangja peria maliba yong court-i interim bail agütsütsü temsüa lir ta angateta local sureties ana den sen 30,000 bond nung anticipatory bail agütsü.

SANGDONGER

Chami aser Kelingmen yim ana tsüngda Anki shir lia aruba 19 July, 2025 anogo Kelingmen Yimtak yim anaprongla nungi yimden yimsüsür aser Arogo tenzüker na longjemer tatok meshitepa aser tatok agütsütepa Anki lapokba tepela lemsateper.

Kibubar wadang nung,

Mr. Wati

Pastor

Chami Baptist Arogo

Mr. Jongshimanen Lkr

Pastor

Kelingmen Baptist Arogo

Sao Chang College nung NU CBCS Topper tem tushi

Dimapur, Chiteni/July 20 (TYO): Sao Chang College, Tuensang nung July 18 nü Nagaland University CBCS Topper tem tushiba sentong ka agiogo. Iba sentong nung Minister of Housing and Mechanical Engineer, P. Bashangmongba Chang alakteta jaoker liasü.

Sentong nung o jembiba mapang Minister-i, takok tajung anguba kaketshirtem tushitsü atema pa jokba atema Principal aser faculty-i anir iba sentong ayongzüka team dang kanga pelaba lemsatep.

Pai ashiba agi, Sao Chang College ya Nagaland nung college tejentiba rongnung ka lir aser idak nungi kümtem tsüngda gazetted officer tem, tongtibang lenirtem social worker tem,

yimden yimsüsürtem, obendangertem aser entrepreneur tem aika adokdaksüogo, ta ashi.

Paisa, Nagaland University Examination 2025 nung iba college nungi temaba jenjang nung takok anguba kaketshir tenet adokba ya Sao Chang College atema tepela aser nemadangtsü mapang ka lir ta ashi. Iba takok ajanga institution nem konang tetushi bener arutsüba dang masü saka kaketshirtemi bendanga agüja meranga inyakba den tesayur aser tsürapurtemi parnok masetshi-i nongita yariba kuli agütsür, ta pai ashi.

Minister-isa, Sao Chang College tesayurtem nem parnok mapa tajung asoshi tenüngsang

agütsü, koba tawa sangdongba NU Result ajanga kuli agütsür ta ashi.

Sentong nungsa, SCC Principal Dr. Lanurenla-i lokti pela agizükba o jembiba, Deputy Commissioner Tuensang, Lithrongla Tongpi Rutsa-ia o tatsüka jembiba, PCB 3rd NAP BN Church tetsür lenir Tonchingsangla-i temaotsü meshizüka sarasademtsü aser Dr. Lal Veda Chandra Kumar V/P SCC-i tepela i jembiba liasü.

Sentong ya Assistant. Professor SCC Akyuba Sangtam lenisüba nung agi. Minister meina District Planning and Development Board, Tuensang züngsemtem, kin balala nungi lenirtem aser kaketshir lokti tentet balala oa liasü.

Longmatra nung Mango Festival mungogo



Dimapur, Chiteni/July 20 (TYO): MLA & Advisor, Home Guard & Civil Defence, Fire and Emergency Service, Relief & Rehabilitation, S.Kiusumew Yimchunger-i July 19 nü Kiphire district kübok Longmatra jila Public Ground nung Longmatra Mango Festival ayongzüka amungba moaja liasü.

Iba sentong nung Deputy Commissioner, Kiphire, Tamsuwati Longkumer NCS tetushi tejaoker liasü.

Tongti tejaokeri o jembiba mapang, Nagaland Chief Minister Dr. Neiphiu Rio-i state nung sentong balala kanga tongtibang süa agiba atema pa nem tenüngsang agütsüba den, state nung aluyimertem libaliro ajungkettsütsü atema teyari balala agütsütsü asoshi sorkar renema lir ta ashi.

Paisa, Longmatra ya Kiphire district atema kikümtong lir ta shia yimtsüngtem dang ali temo ya takok tashi amshitsü ayongzüka liasü.

Advisor-isa, Longmatra

Mega Job fair indang metetdaksü

Dimapur, Chiteni/July 20 (TYO): Deputy Commissioner, Tuensang, Lithrongla Tongpi Rutsa-i sangdong ka ajanga, CM indang Flagship Programme - NSEDM kübok Mega Hospitality Job Fair ka July 25 nü akatsü ta metetdaksüogo. Iba fair nung adentsü jangraratem ajak jaokogo, koba district nung mapa mongui aliba lanurtem atema maongka tajung ka asütsü.

nung alirtem dang marketing tetoktepba nung shilem agütsü aser maongkatem agütsü atema meranga inyaksü ajungshi, kechiyong Kiphire district nung süngjanglijang benjung balala ayongzüka amungtsü lenmang sadema lapoka lir, ta ashi.

Maneni pai department dang district nung aliba aluyimertem nem takokba tashi teyari agütsütsü mepeshiba den Longmatra temeket nung aliba yimtsüngtem dang tarutsü nung titi ya senotsü aazüktsü atema tsünä ayoktsü ajungshia liasü. Kasa mapang nung tetushi tejaoker Deputy Commissioner Kiphire, Tamsuwati Longkumer NCS-i, taküm liyonga aotsü atema senotsü aazüktsü asoshi yimtsüngtem nung social media amshitsü nungdakba lemsatepba den sen aazüktsü asoshi sorkar mapa kija masü saka tanga lenmang aika lir, ta ashi.

Paisa, tanü ya tetenzüker dang ta shia aluyimertem dang tarutsü atema maneni inyaksü ajungshi. Tanü benjung ya tila kadang asütsü akok, saka

Tuensang nung career guidance seminar agi

Dimapur, Chiteni/July 20 (TYO): District Administration Tuensang aser Eagle Crest Training Academy and Consultancy na longjemmer July 19 nü Tuensang Town Hall nung Employment Linked Career Guidance Seminar ka ayongzüka katsüogo.

Iba seminar ya Nagaland Skill and Entrepreneurship Development Mission (NSEDM)

ajanga Nagaland sorkar indang flagship programme kübok Nagaland nung lisopurtem nem Aviation, Hospitality aser Cruise line Industry tem nung training aser placement atema maongka agütsütsütsüba dak rangloker agia liasü.

Iba Career Guidance Seminar nung Tuensang jila nungi kaketshir 400 dak temai shilem agia liasü.

ABAM Ministerial Secretary tem aser MAOT mensem ka menogo

Mokokchung, Chiteni/July 20 (TYO): ABAM Ministerial Secretary-tem aser Mokokchung Ao Officers' Telungjem (MAOT) mensem tajung ka Chiteni 17, 2025, Fazl Ali College conference Hall nung agia liasü.

Rev. Tamsü Jamir Executive Secretary, ABAM-i, Mokokchung Ao Officers' Telungjem-i nüburtem asoshi aria bilema Coaching center lapokba aser arogotem nung tenzükerem asoshi Skill Development training agütsüba ajak asoshi pelaba lemsa liasü. MAOT dang, nenok tanü kechi nung mena lir, iba mendenji Tsüngrem nungi aruba lir. Anungji nüburtemi nenoki yutsüba tsüngneb tajung ngua, parnok yabo khenyongi balaka liasü ta menungraba O jembitsüba bendanga agüja tenzükan, ta paisa ashi. Tarutsü nükla indang jembidang pai ashiba agi, ABAM resource Center Kangtsüng ya ano maneni tajungba kuma yanglushia ecotourism center ka

yanglua nübur asoshi tangazükba tesem ka asütsü aser Impur tesem ya tanelar luyim nung arangtetba longzüka ama yanglua nüburtem temoatsü agiba tesem yangertsü asoshi teyongyaba o ashi.

Sensaksem agiba mapang tajung agia Executive Secretary-i tarutsü nükla ayuba indang takoktsü lenmangtem asameyanga jembiba den, tanü asen lima nung communitization dak sendakba nung Arogo aser ABAM-i yaritepa inyakra mapa aika nung takok angutsü indang kanga tongtibang ta sensaksema liasü. Hospital koba Impur nung lir iba ya maneni lokti ajak teyaritep nung temaba jenjang ka nung yanglua amshiba ajanga nüburtem aisü nung teyari angutsü ta jembiba liasü.

Lokti ajak kanga tongtibang lir aser ajak longjemba nung takok angutsü alinung, maneni asen Aor lokti ajaki teka amtepa mapa ajak nung arok ta angateta inyaksü tamang ayur, ta kasa sangdong ajanga metetdaksü.

Tseminyu nung District De-addiction & Rehabilitation Centre lapokogo



Dimapur, Chiteni/July 20 (TYO): Ministry of Social Justice & Empowerment, Government of India-i senotsü teyari agüja yangluba District De-addiction & Rehabilitation Centre ka July 19 nü Tseminyu district kübok Thongsünyu yimtsüng nung lapokogo. Iba Centre ya MLA & Chairman DPDB, Tseminyu, Ar. Jwenga Seb-i alakteta jaoker ama lapokja laisü.

Sentong nung o jembiba mapang Seb-i, iba centre tasenba ya facility balala agütsütsüba atema dang masü saka temelenshi atema tejenokdak ka, raksar alibatem yangushiba tesem ka aser parnok taküm tasen tenzütsü atema tashi anguba tesem ka lir, ta ashi.

Paisa, temesepba mozü achiba ya jurila ken o ka masü saka lokti asoshi tayongzüka ka lir, koba ajanga kibong, lokti aser linük tarutsü dak kongshir, anungji iba centre ajanga lanurtem kümzüka ayutsü aser samar alirtem dang len sayutsü atema lokti bendanga agütsür aliba sayur, ta ashi.

Paisa, reintegration, counseling, medical treatment, therapy aser vocational training

agütsütsü koda tongtibang iba indang lemsatepa liasü.

Sentong nungsa tetushi tejaoker ama Deputy Commissioner, Tseminyu, Japheth Woch (NCS)-i o jembiba mapang, temesepba mozü anema rara ya sorkar kija khuret masü saka arok khuret lir ta ashi. Tsürapurtem kümküma alitsüla, school temi yakyaka shilem agütsüla, Arogo aser lokti tentet balalai iba atema ola adoktsüla aser teyari agütsütsüla aser ajak dak alaka asenoki akseta masü saka tasü ita addiction indang satok satoka jembitsüla, ta pai ashi.

Pai ashiba agi, District Drug Addiction Centre ya temesepba mozü achirtem nem parnok taküm meyipa agütsütsü aser lokti nung nükjidong ka yur meraketa alitsü atema teyari agütsütsü asoshi lir.

District De-addiction & Rehabilitation Centre lapokba sentong ya Gwahulo Kent lenisüba nung agi aser Project Coordinator, Timothy Thong-i okila jembiba liasü. Maneni sentong nung project in-charge, Philip Seb-i tir o jembiba aser Rengma Hoho-ia o tatsüka jembiba aser Project Coordinator Reuben Seb-i tepela o jembiba liasü.



July 20, 2025 nü Jammu nung Congress party nung inyakertemi Jammu & Kashmir nem tanaben state jenjang agüjang, ta takhangba agüja longkak aitdang tangokba noksa nung angur.

Centre-i Parliament nung 'Operation Sindoor' atema jembitsü melunger

New Delhi, Chiteni/July 20 (Agencies): Tzüngluruwa mongpu Parliament tenzüksü anogo ka dang lia Centre sorkari Operation Sindoor atema jembitsü melungogo.

Opposition INDIA teloktepi mapang talangka nungi Operation Sindoor atema Parliament nung o enteptsü takhangba agüja aruogo.

Parliament senden July 21 nü tenzüksü aser August 21 nü tembangtsü.

Tan mongpu Parliament senden nung linük security, foreign policy aser election dak sendakba onük balala nung o enteptsü akok.

Hombarnü Parliament senden tenzüksü lia iba senden junga agitettsü atema Amongnü sorkari party ajak senden ka ayongzüka liasü. Party ajak senden maongkaji agia opposition-i Parliament nung tongtibang onük balala nung o enteptsü atema takhangba agütsü.

Iba senden nung sorkar tenüng nung Parliamentary affairs minister Kiren Rijiju aser

minister of state Arjun Ram Meghwal na aden.

Senden nungji Congress lenirtem Gaurav Gogoi aser Jairam Ramesh nati sorkar dang, "Parliament nung Congress-i süokba tongtibang onüktem ajak nung Ato kilonser Modi-i telangzüba agütsütsüla," ta ashi.

Honibarnü Opposition teloktepi video conferencing ajanga senden ka ayongzüka menogo. Iba senden nungji party 24-i Parliament nung tongtibang onük 8 süoktsü atema telemtetba agiogo. Item onüktem rongnung kiralongrartemi Pahalgam amakba, Operation Sindoor agiba, US Tir Donald Trump-i pai tiyongtsü ia inyakba ajanga India aser Pakistan na tsünga nuclear rara nokdangtet ta jembiba, India nung foreign policy aser Bihar nung Election Commission-i electoral rolls repringshiba onüktem densema lir.

Iba senden nung shilem agia adenertem rongnung Congress nungi Sonia Gandhi, Mallikarjun Kharge, Rahul Gandhi, K C

Venugopal aser Jairam Ramesh nung, Samajwadi Party nungi Ram Gopal Yadav, Trinamool Congress nungi Abhishek Banerjee, Shiv Sena (UBT) nungi Uddhav Thackeray aser Sanjay Raut na, NCP (Sharad Pawar) telok nungi Sharad Pawar aser Jayant Patil na, National Conference party nungi Omar Abdullah, JMM nungi Hemant Soren, RJD nungi Tejashwi Yadav aser DMK nung Tiruchi Siva nung liasü.

Kasa senden nungji Left aser regional parties nungi D Raja (CPI), M A Baby (CPI-M), Dipankar Bhattacharya (CPI-ML Liberation), Jose K Mani (Kerala Congress M), N K Premachandran (RSP), Thol. Thirumavalavan (VCK) aser K M Kader Mohideen (IUML) nung liasü.

Taküm April 22 nü Pakistan nungi kiralongrartemi Jammu & Kashmir kübok Pahalgam amakba mapang nung nisung 26 khaseta liasü. Iba sülen Indian Army temi Operation Sindoor agia Pakistan aser PoK nung kiralongrartem camp 9 amak.

Niger nung India nung ana tepset aser ka puer ao

New Delhi, July 20 (Agencies): Mongolbarnü Niger kübok Dosso region nung kiralongrartemi amakba mapang nung India nung ana tepset aser Jammu & Kashmir kübok Ramban district nungi Niger nung oa alir Ranjeet Singh puer ao.

Mejangjaba kiralongrartemi Nigerian army unit ka amakba mapang nung India nung anaji tepset aser ka puer ao.

Iba tatalokba dak sendakba nung Amongnü Jammu & Kashmir chief minister Omar Abdullah-i External affairs minister S Jaishankar dang Ranjeet Singh kümzüka anir arutsü atema inyakdaksüner, ta mepishio.

Amongnü Chief minister office-i X ajanga, "Ramban nungi Ranjeet Singh, Niger nung puer aoba atema chief minister-i tibelemtsü akaba lemsatepogo.

Pai EAM @DrSJaishankar aser @MEAIndia dang Ranjeet taküm kümzüka anir arutsü atema rongdak süa inyakdaksüner ta mepishio," ta metetdaksü.

Niger nung aliba Indian Embassy-ia kiralongrartemi amakba osangji metetdaksüba den külemi parnoki Niger nung ketdangsertem den amalitepa inyakdar, ta metetdaksü.

Indian Embassy-i X ajanga, "July 15 nü kiralongrartemi Niger kübok Dosso region amakba mapang nung India nung ana süogo aser ka puer ogo. Onoki mangyimer kibongtem den mangyim jashi lemsateper," ta metetdaksü.

"Tasü mang anaji India-i bener arutsü aser puer aoba India nung kaji kümzüksü atema Niamey nung aliba Indian Mission-i Niger

ketdangsertem den tongtepratepa inyakdar. Niger nung aliba India nung ajak dang kümküma aliba mepishir," ta Embassy-i metetdaksü.

Ranjeet Singh'er kibong ya Ramban district kübok Chakka Kundi yim nung lir. Par kibongi sorkar dang pa kümzüksü atema inyakdaksüner ta mepishio.

Par kinünger Mohan Lal Sen-i, "Onoki Modi dang pa kümzüksü atema inyakang ta mepishir. Pa kümzüka anir arutsü atema India sorkari inyaksüla. Tesüiba ansogo 5-6 onok kanga shisabulur," ta metetdaksü.

Singh tetsüi, "Pa tang kong aliar onoki kanga shisabulua bilemtsür. Par tanur tila asem lir, aser parnoka shisabulur. Onoki ozü jabaso kümzüka anir arudaksüner," ta ashi.

METETDAKTSÜR

Longchara Baptist Arogo Pastor Quarter fund raise Lucky Draw koba 1st August 2025, anogo adoktsü liasü, mepaidoktetba maparen kar ajanga 31st Oct 2025 (2:00 Pm) anogo melenshiba committee ajanga sangdonger.

PM Modi-i United Kingdom aser Maldives na semdangtsü

New Delhi, , July 20 (Agencies): July 23 nungi July 26 tsünga Ato kilonser Narendra Modi-i United Kingdom aser Maldives na semdangtsü.

Linük ana denji tesendaktep tashi itshitsü nükjidong nung Ato kilonseri item linük semdangtsü; iba mapang nungi shishilembaba dak sendakba nung tezüngzüktep tasen agitsü imlar.

July 23-24 anogotem nung UK semdangba mapang nung India-UK Free Trade Agreement (FTA) tezüngzüktep agitsü, iba sülen pai Maldives semdangtsü.

Taküm May ita nung Ato kilonser Narendra Modi aser British Ato kilonser Keir Starmer na phone ajanga sensaksemba sülen India aser United Kingdom nati free trade agreement atema sign süa liasü.

FTA atema sign asüba sülen Modi-i X ajanga, "Kü medemer PM @Keir_Starmer den jembiogo. Tang alizüng ka tongteta India aser UK nati

külem tajangzüik angutsü atema Free Trade Agreement agiogo. Item tezüngzüktep ajanga asen linük ana tsünga Comprehensive Strategic Partnership tajungba akümtsü, shishilembaba jenjang ajungkettsü, mapa adokdaksütsü aser rongsenkettzüng jenjang tajungba akümtsü. Ato kilonser Starmer-i tekeraba nung India semdangtsü yongyar," ta metetdakja liasü.

July 25-26 anogotem nung Modi-i Maldives semdangtsü aser 60buba National Day sentong nung tongti tejaoker ama adentsü.

Maldives nung Mohamed Muizzu Tir akümba sülen tang mezüng Modi-i Maldives semdangtsü. Maldives nung lenir kari 'India Out' campaign agiba sülen linük ana tsünga tesendaktep raksar lia pai Maldives semdangtsü. Maldives semdangba mapang nung Modi-i iba linük den tesendaktep tashi itshitsü atema jembitsü.



July 20, 2025 nü Raj Bhavan, Thiruvananthapuram nung Kerala Angh, Rajendra Arlekar-i Chief Minister Pinarayi Vijayan agizükdang tangokba noksa nung angur.

China-ia kiralongrartemi J&K kübok Pahalgam amakba aitsü

New Delhi, Chiteni/July 20 (Agencies): Tawa United States-i The Resistance Front (TRF) ya Foreign Terrorist Organization (FTO) ka ta sangdongba sülen China-ia kiralongrartemi Pahalgam amakba sashia aitsüba den külemi kiralongra anema region nung aliba linüktemi amalitepa raratsü ayongzüik.

TRF telok ya Pakistan-i pusemba Lashkar-e-Taiba (LeT) nungi jakzüka lir aser April 22 nü Pahalgam amakba ya iba teloki lir.

Osangbener den jembidang China foreign ministry otongdar,

Lin Jian-i US-i kiralongra anema raraba atema tenüngsang agütsü.

US state department-i TRF ya Foreign Terrorist Organization ka aser Specially Designated Global Terrorist (SDGT) ka, ta sangdongba dak sendakba nung tasüngdangba ka langzüdang Lin Jian-i, "China-i kiralongra tapu ajak anemer aser April 22 nü kiralongra tatalokba sashia aitsür. China-i region nung aliba linük ajak dang kiralongra anema amalitepa ratatsü aser region nung security atema inyaksü ajungshir," ta metetdaksü.



TIR YIMYIM YIMOBILEM (EDITORIAL)

DIMAPUR

TENTONÜ

CHITENI 21, 2025

Telongpur kija dang atongtsüla masü !

Nagaland nung tangar shishilembaba yimti tera mesükba yimtiji Dimapur ya dang lir. Atangji, asenokibo iba yimti yimdong lenmanga meyangluteter aser taoka moktet janaona agi sünga lir. Ajisüaka, asenok akaba agi ojang aser tang tashibo asenok tangatetba aser jakla agia ojang, anungji Dimapur nung ya koba government özüng amshia yimsüa asüar mejangjai ka kümogo. Ibayongji, tanga osettsüset nung saru meshiba otsütemji toktsür, anogo shia asenoki alia achiba chiyongtsü bengana, gopi aser alo beyaz ayokertem dang item aonsutsütem nung seret shia senpak asemsem pezüzü anogo shia saru (tax) sarua agira, itemji tayokertemi masü saka talirtemi agütsüdar ta bilemdi. Aji oda, yashi yakanüang Dimapur nung item aonsutsü 'wholesale' ayokdak nisung kati Dimapur Municipal Council tenüng nung bengana seret shia sen 3 aser gopi seret shia sen 4 tax saruba puteta apuba otsüji Naga nung er ajak akoksadajka aruba otsü lir. Chiyongtsü ayokdak chiyongtsü ayokba ya teka aika belenteper külenang tesüsa talir, tagir aser tachir ket atonger. Aji oda, tamasa aluyimertemi alu nung itemji züsanteter aser aluyimertem nungi parnokki züsantetba ajungaji kari alizüka bener oa yimti nung aonsutsü chikujunga 'wholesale' ayoker nem agütsür aser ano parnok nung jagi terara ayoktsü (retail) purtemi alizüker tesüsa talir, customer-temi alir. Iba shishilembaba tsüngda nung saru sarurtemi wholesale nung ayokertem danga tax agir aser ano kasa oset retail ayokdak yoka aliba nunga meshir, anungji asen lima nung shishilembadak saru sarurtemibo oset ka nung anaben saru agir. Aji oda, bengana whole sale ayoker dang nungi seret shia senpak 3 agir aser kasa benganaji retail dokan nung oa ayokdaka seret shia senpak ka agir ta süra, bengana ayokertemi bengana seret shia kecha masüba nung lendong timtem maginüba agi sen talila senpak 4 tax sarur nem agütsüogo ta bilemdi. Ajisüaka, item bengana ayokertemi tangar nem saru agütsüba senpak pezü jagi parnok akoksar benganaji mayoktsü, kechiyong parnokbo tajangzük nung ayoktsüla, anungji saru sarur nem kecha menungnangi agütsüba senpak 4 to dokan nung bengana alir asenok dang nungi agitsü. Ibayongji, bengana seret nung sen 20 ang asütsüba to seret nung sen 30 meshitsü aser asenoki tera tokang ta mepishidang pelashishia sen 5 toker sen 25 agi ayoktsü. Aji oda, anogo shia Dimapur nung bengana seret meyririjang ana yokra tax meshisangjibo anepdang shia bengana kisüng nung tax saruba agi sen meyririjang 4 bo ngudar ta bilemdi. Ibaji kodang inyaktangdir, tax sarusangji ita nungbo kecha meinyaki angati lakh ka dak tali arudar ta bilemdi. Ibaji bengana kisüng nung, saka kasaji gopi, alo, beyaz, mersü aser tanga aonsutsü ajak nung agidagi. Iba amaji asenoki memetet ser aonsutsü ali shia asenoki shishilembadak özüng alema saru sarurtem nem sen agütsüdag. Asenoki item saru sarurtemji telong nung alirtemi sarur ta bilemer, saka tanübo telong nung alirtem dang nungibo tema nung alirtemi teimba özüng alema saruba puteter. Aji oda, kari telongpur tenüng nung aser kari Municipal pur tenüng nung ta aonsutsü aser kisüjensüba osettem tapu shia nung saru saruba agi parnok tenünga menüker. Atangji, parnokia sarua alitsü saka tanübo telongurtemi saruba dang nungibo telongpurtem tenüng nung saruba purtemang teimba lir. Ano, Naga nungertem asoshi lendong kaji, item aonsutsü aser osettsüset ayokertem dang nungi saru meshirtemji Naga nung er masü saka tsümartemi sarur, anungji Naga nung er saru ajanga tsümartem aika par lima nung oagi kiojen tajung yangluba osanga angashir. Aji oda, Naga nung er Naga nung er dang saru agiba tsüngda tajangzük tuluba angurtemjibo tsümar akümer. Atangji, Municipal aser Town Council -tem ya shishilembartemi saru, fee, tapu balala agütsüba nungi parnok nungdak inyaktü, ajisüaka asenoki metettsüba kaji Municipal aser Town Council tentetba ya saru sarutsü asoshi masü saka pei yimti nung shishilemba dak jenjang shitak lateta yokdaksütsü aser pei aliba yimti renlokdakja topur junga ayutsü atema tentetba lir. Iba tangatetba nung Nagaland nung ULB ajak merangtepdar asütsü imlar.

OLEMSABANG

Sarasadem tesep koma asünung tajungba süla

Limatula Longkumer

(Yashi adok nungi...)

Mungdang aser local arogo anaprongla nung nüburttem, talisa maka maitertem, anepalutsüba ya tera senzuka aor amai nibo ajiteter. Tenzüker kwikadi pei santem timtem tia meteta lir? Asenok arogo nung toklang tenzükertem küm tepiyong program achayangba nung mapang teimba ka intoker. Ministry ya kanga mejungi institutionalized süatokogo. Hau, arogoji Institution ka lir, saka ibaji rigid institution küma ora nüburtaginübaji mabensatettsütsü akok. Arogo nung temzüngji nungdak tiptema aotsü asoshi saka özüng nungji onsara



ora ministry nung aiben tetsükdak adoker. A. P. Nirmal, India nung theologian nungtugu kadi India nung pastoral ministry indang yamai shia lir "pastors are functioning like pujaris, caretakers and chowkidars of the mission compound and church traditions and neglect the essence of pastoral ministry". Ochi shia dang ashir pastor aika kiboksem nung tashi mait, aser ibaji nüburttemi teti mepelai jembir. Pastor dangi sarasademjang ta arutsüba aiben arendaka bilemer kechiaser parnokki kanga dang mazüngi aliba nisungtem lir, saka prayer centre-ibo mapang mashi ka nung oteter. Asenoki metetdi, pastoral ministry ya 24 hours a day and 7 days a week. Tetezü, tenzükere kaji nüburt asoshi teti azünga aliba, yarinüa aliba nüburt ka asütsüla. Tanü tensa den putepa, nüburt aginüba ama ministry issue based nung yanglushitsüla. Tanü Mungdang staff-tema akhi ama arogo sema jajaba ajema kümogo, arogotemi aobaji teimba ka local arogoi sentong nung ajadang aoba lir. Yamai dang aonungbo Mungdang nung tenzükere local arogo tia memeteti akümtsü akok. Mungdang nung tenzükertema nüburt aginütsüsa aser shisatsü agütsütettsüsa alitsüla. Iba denji Mungdang nung tenyaba mapa nung putu den apet inyaktü asentenshi kanga nungdaka kümogo.

Sarasadem teloki arogoi inyaktü mapa duplicate masütsüla: Tajungtibaji arogo kübok sarasadem tesep alitsüla. Saka yamai dang independent süa aotsü asünungbo aser sarasademtsü asoshi lapokba süra iba sarasadem nungji nendak nendaka sarasadem tesep-temi inyaktüla. Arogo aser Mungdang inyaktü mapa kasaji meinyaktüla. Angashiba agi centre aika nung Bible study, tekülem sentep aser training ag?tsür ta angazüker. Pei teinyaktü arrtsü meteta inyaktüla.

Arogo nung lenisüba inyakyim (leadership structure) melenshitsüla: Kechiba sarasadem tesep aika akümer? Prayer centre nung kechiba tetsür teimba kibur asür? Counsellortem teimba ka lay people nungi adoker? Iba yagi arogo nung lenisüba aser arogo inyakyim sayur asür ta metetdi. Iba ya structural and leadership crisis den sentaktepa lir. Asenok Baptist tamendakdak kimongji, Priesthood of all believers lir. Saka iba ya noklang nung noklangbo asenoki tang tashi meinyaktetter. Arogo nung class telemsa - takar-sensaker, tulur-tilar tebendang kanga lir.

Sensakertem lemteplemra nung anasai maruteter, tekülem nung shilem agitsü peria mangur. Tetsür-tebur tebendang inyakyim nung ulura lir. Ao arogo nung tetsürtem arogo inyakyim nung sadema aita mali. Kodasür tetsür ta bilemba mulungsentsü ano temulungjang nungi metugui lir. Prayer Centre nung free süa shilem agitsü mapang angur. Tang ABAM teinyaktü inyakyim nung ya women department aser Christian education dak alaka tetsürtem inyaktü kokteta lenmang lapokja lir. Zülü nung tebur dang agitsü ta mali saka tanga department nungjibo tang tashi tebur dang inyaka arudaki. Anungji leadership structure nungji temelenshi tajung marura, ashiko tangbo prayer centre dang lapoka aorako, saka tarutsü nungbo arogo balala pakzuka aotsü ana nung lir. Tanü prayer centre ya arogo nung leadership crisis temaitsü ka lir ta nibo bilemer. Iba tamaitsü ya lendong ka ta meteta arogoi meinyakra, tarutsü nung tebilemtsü adoktsü ta metetdi.

Olepszüng

Iba ocet nung sarasadem tesep aser tang arogo teinyaktü yimya anaprongla repa zülüogo. Ibai asen lima nung tongtibang tebilemtsü ka lir ta metetdi. Ajak ajungtsü mechi ajaki külemi shisatsü agüja arogo aser sarasadem tesep anaprongla yaritepa aotsü mapang tongogo. Süra tangatetep nung külemi Khristar tenzükba wadang bener aotsü. Anapronglai Tsüngrem mapa inyaker, nüburttem tajungtiba nung yaritsü meranger. Anungji sarasadem tesep aser arogo tesentaktep tajung alitsü nungdaker.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir**

Lanur 2,000 dak temai Khrista sülen anidaktsü telemtetba agi



Taoba Bodhbar aonung Indiana Wesleyan University nung summer camp agidang tangokba noksa nung angur.

July 19, 2025: Tang meiwa mapang nung lanur 2,000 dak temai Khrista sülen anidaktsü atema telemtetba agiogo, ta pastor kati metetdaktsü.

Anderson, South Carolina nung aliba Crossroad Camp tenzüksang aser pastor, Clayton King-i, "Tang meiwa mongpu nung kaketshir 2,000 dak temai Khrista nem taküm bendanga agütsüogo," ta metetdaktsü.

Taoba Bodhbar aonung Indiana Wesleyan University nunga kaketshir aikati Khrista sülen anidaktsü telemtetba agia sabangleni ao.

"Kaketshir noklang aikati pei temenen nangzüka Khrista osangtajung agizükba ni kuli süa nguogo. Tzüsem melendar aser tanela asentenshi milak jangrudar," ta pai ashi.

Tan ita tetenzüklen-a iba University nung kaketshir 1,000 dak temai Tsüngrem külema Yisu tenüngsang ken tena liasü.

"Iba putu lanurtem ajanga ni süngmanger. Parnoki Laishiba azünger. Parnoki ochi atema tzürar. Tanela Temeshi ajanga mapa inyaker," ta pai social media ajanga metetdaktsü.

1996 küm mezüng pastor King-i Crossroads summer camps tenzükba sülen taküm

küm 30 jungogo. Iba ministry-i tesüiba küm 30 tashi Khrista osangtajung lemsatepa arur.

2023 küm interview ka nung jembidang pai, "Ozü ministry-i Khrista osangtajung tejangja lemsateptsü atema mangdang yur inyaker aser chichiba tekümtet indang onoki lanurtem den lemsateper. Onoki osangtajung lemsatepba den külemi parnok pelatepa amongtsüsa camp ayongzüker. Billy Graham-i inyakba ama onokia Khrista dangi arutsü atema tayongzükba agütsür," ta metetdakja liasü.

Tesüiba mapangtem dang nungibo tang lanurtem teimbai Khrista agizüker asü?, ta asüngdangba langzüdang pai, "Au" ta langzü.

Pastor King-i, tawa hopta trok tashi agiba camps ya khenyongi balaka liasü, ibayongji kaketshirtem aikati Khrista osangtajung agizüker, ta ashi.

"Camp nung adentsü atema arur lanurtem aikati kodanga Khrista osangtajung mangashidangi liasü mesüra khen-anaben dang angashidanga liasü, mesüra tekümtet osang parnoki mangashidangi liasü. Anungji tang kaketshirtem den inyakba

ya khenyongi balaka lir," ta ashi.

"Küm ter tejaklen onoki ayongzükba camps-i arurtem aika Arogotem nungi liasü. Parnok aika Khristan kibongtem nungi liasü. Tangbo camps nung adentsü atema arurtemji Tenla kidangi moudangertem mesüra Khrista o s a n g t a j u n g mangashidangertem liasü," ta pai ashi.

Hopta tetenzüklen camps mezüng aonung North American Mission Board nung National Next Gen Director, Shane Pruitt-i, "Davis, Oklahoma nung ayongzükba Falls Creek Oklahoma Youth Camp nung lanur 157-i Khrista sülen anidaktsü telemtetba agi," ta metetdaktsü.

Tamalen Pruitt-i, COVID-19 wara sülen lanurtem aikati Khrista nem taküm bendanga agütsür, ta metetdakja liasü.

"Ni tesüiba küm 20 tashi ministry nung tenzüka aruba mapang nung lanurtem teimbai Khrista nem taküm bendanga agütsübaji tesüiba küm 3 tsüngda liasü," ta pai ashi.

Pruitt aser King napronglai, tanü putu lanurtemi ochi bushir aser ochiji Yisu dak angur, ta ashi.

Taruba ita London nung 'Make the UK Holy Again' sentong agitsü

July 20, 2025: Taruba ita London nung anogo pezünü sentong ka ayongzüka lir; iba sentong ya 'Make the UK Holy Again' nükjidong nung ayongzüker.

Iba sentong nungji denomination balala nungi Khristantemi shilem agitsü. Iba sentong ya Esther Prayer Movement aser London Shepherd Church nati senteper ayongzüker.

Esther Prayer Movement ya non-denominational prayer group ka lir, aser parnoki Republic of Korea, United States, Israel aser linük balala nung tamangertem telongjem atema sarasademmer.

August 4 nungi August 7 tashi agitsü aliba sentong nungji South Korea, US aser UK

nungi Khristantem adentsü. Yaküm parnoki "Make the USA Holy Again" sentong Atlanta, Georgia nung ayongzüka agi aser taküm 'Make UK Holy Again' nükjidong nung iba sentong ayongzüker. Iba sentong ya ajanga UK nung tanela asentenshi milak jangrutsü imlar.

"Make the UK Holy Again" ya London nung aliba Emmanuel Centre nung agitsü. Iba sentong ya Christian Concern-ia pusemer.

Christian Concern chief executive, Andrea Williams-i, "Onoki UK nung tanela asentenshi milak atema sarasademsü. Tanur-tain ajak, tesem ajaklen aser denomination ajak nung tanela asentenshi milak jangrutsü

atema onoki sarasademsü. Tsüngremi nisungtem melungjang nung jembitsü aser linük nung temelenshi tulu adoktsü atema onoki longjemer sarasademsü," ta metetdaktsü.

Anogo pezünü sentong nungji tamangertemi lumia sarasademsü, tekülem sentong agitsü aser sayutsüngitsü.

London Shepherd Church nung pastor Paul Song-i, "Iba Conference ajanga ni United Kingdom tesem ajaklen tanela asentenshi milak nguner," ta metetdaktsü.

"Korea nunger sarasademba yimya nung asenok longjemer sarasademsü atema ayongzüker. Kanga Pelar. Tsüngremi moajang," ta paisa metetdaktsü.

ANOGO ABEN TSÜNGREM DEN

Tashi mait temang

Tashi mait temangji mashilen angatetra tebilemtsü akümer. Aseni aji koda agizüker yamaji alitsü.

Ni ku tashi maitji Tsüngrem nungi aruba temerenshi ama bilemra ni iba lar talenbaji sabur. Ni ibai meruktettsüba mi ama agira, ni tesungjem agi iba nungi adokba ataa alitsüla. Ibai Kibubai pa taribi molutetba lir!

Anungji Kibubai nukpoksang tenük apokba mashileni angateta aliba tama metongshitsür; "Iba nisungi mesüra pa tsüraburi temenen mebenshi." Iba jagi tejashiji sangwaa kümdaktsü. Iba jagi shisabuluji taochi tesangwa len yutsü. Iba jagi temulung lemtsü adokdaktsü. Tereprangtsü tasen ka adok aser pa tejak nung tesangwa angu; pa tesangwa nung yutsü.

Idangji asen Kibubai nükpoksang tenük lapoktsü. Nükpoker tenzükba mapaji atalok, aser tenük agütsü. Asen Kibubai tepuokdakji mungui meyutsür. Idakji pai asenok kodanga mamadoker. "Pa shibai Israel anüker, memejanger mesüra amoa maor." Anungji pelaang, Kibuba ne tsütsü lir! Sayatenya inyakeri pa mapang metet, aser tammangtiba (darkest) lenmangji kotaker sangwa agi melentsür.

Tatartemi Muslim linüktem nung Khristantem reshikangshiba aitsür

July 20, 2025: US nung Moore-i, "Alima tesem balala Republican züngsemtemi bangzüng ka renema Muslim nütsüng teimba aliba linüktem nung Khristantem reshikangshiba aitsüogo.

Parnoki renemba bangzüng ajanga US sorkar dang, US foreign policy nung tamangba yimsü temeden ya tongtiband onük ka kümdaktsütsüla, ta mepishi.

Rep. Riley Moore, R-W.Va. aser Senator Josh Hawley, R-Mo. nati Nigeria, Egypt, Algeria, Syria, Türkiye, Iran aser Pakistan ama linüktem nung Khristantem kanga reshikangshiba metetdaktsü.

Muslim nunger nütsüng teimba aliba linüktem nung Tenla kitem shibangdaktsüba, Khristantem aser lenirtem apuba, kangshia tanga yimsü dangi meyipdaktsüba aser tekülem agitsü temeden magütsüba metetdakja parnoki US Tir dang item linüktem nung yimsü temeden atema shishilembaba aser security ama inyakyim benoktsü mepishi, ta ADF International-i metetdaktsü.

Bangzüng nungjisa Open Doors-i renemba 2025 World Watch List report metetdakja lir. Tang alima nung Khristan nütsüng million 380-ibo reshikangshi ajangshir, aser item nütsüng teimbaka Muslim nütsüng teimba aliba linüktem nung lir.

Taküm April ita nung Congress züngsem Ripley

nung Khrista nung asen adianu aikati reshikangshi ajangshidar. Iba ya khenyongi magizüktettsüla," ta metetdakja liasü.

"Nigeria kija nung Khristan 50,000 dak tali tepsetogo aser million 5 dak tali jenshiogo. Taoba ita Damascus nung Islamic kiralongrar kati Tenla kidang tamangertem dak injang khaloktsüba sülen bomb ka pokdaktsüba mapa nisung 30 asü. Item tatalokba ya anogo shia Khristantem anema inyakba aser tepsetba tatishitsü kar lir," ta pai metetdaktsü.

Senator, Hawley-ia, "Alima tesem balala nung Khristantem reshikangshiba mapang nung asenok ajemajema dangbo malitsüla," ta metetdakja liasü.

Iba bangzüng ajanga parnoki US sorkar dang Middle East nung ketdangsertem den senden amenba mapang nung Khristantem reshikangshiba onük süoka jembitsü mepishi.

Iba bangzüng pusemertem rongnung W. Gregory Steube, Michael Guest, Glenn Grothman, Addison McDowell, Brandon Gill, Anna Paulina Luna aser Pat Harrigan nungera densema lir. Iba dak alia Defense of Christians, Global Christian Relief, CatholicVote, Christians Engaged, Advancing American Freedom aser Save the Persecuted Christians teloktemia iba bangzüng pusemogo.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Terenlok

(adj) teimba akümba, tajungba aser tuluba küma inyaktetba
(Development, progress)

* Asen lima nung nütsüing terenlok mali akümer.

Teret

(n) temang nung temerang shilem (bone)

* Nisung ka temang nung teret tapu ajak agi 206 lir.

OLONG PAITEP # 7215

1		2			3			4		5
							6			
7			8							
							9			10
		11								
12										
					13					
14				15				16		
17										
							18			

TIPIEN

- Lapok / Tenzük
- Tarutsü indang tetzü
- Yimer ajak
- Ishika dang
- Terongtong aser tepi
- Tetsüingda
- T _ _ _ _ i
- Tsürabur nungi lemsükba
- Tetsür tanur dang ajaba
- Shirang ajung

LANGTSÜNGLEN

- Pei tasoli
- Iba anogo
- Telemsa ka
- Maneni
- Tekaratiba nung
- Ki temalen
- Temejung
- Teimla aka
- Tajatsü
- Molung
- Anogo semer ka
- Tashi balaka

OLONG PAITEP # 7214 TELANGZÜBA

TIPIEN :

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon, 4. Aso,
- Nile, 9. Alizüing, 10. Omen,
- Lemta, 13. Ola, 14. Kin.

NAI-A YA METETTER MA



- Alima nung 'chewing gum' tejentibaji küm 9000 tema lir.
- Tanga chiyungtsütem dang nungi nisung teimbaka allergic agi kangshibaji nashi mamatzü ajanga lir.

Arunachal kübok Namsai nung IED ngutetogo



Itanagar, Chiteni/July 20 (Agencies):

Arunachal Pradesh, Namsai district nung Piyong circle kübok Nongtaw yimtsüing nung Improvised Explosive Device (IED) ka Honoibarnü nguteta liasü.

Arunachal Pradesh anütoklen aser Assam anütoklen security force temi telungpurtem anema inyakyim tali benoka inyakyonga aoba mapang iba IED ya nguteta liasü.

Iba tesem nung Ulfa (Independent) hit squad aika mongzüka aliba indang

itangitertem nungi osang angazükba sülen security force temi meita aoba sentong tali benoka inyaka liasü.

"Honibarnü Assam Rifles, CRPF aser Arunachal Pradesh Police longiemer meita aoba mapang Improvised Explosive Device (IED) ka Namsai district nung Piyong circle kübok Nongtaw yimtsüing nung nguteta liasü," taketdangsür kati ashi.

Iba IED ya culvert ka anasa ngutet aser source-i ashiba agi, iba ya security force tem dak rangloker toktsüba liasü. Iba

masüidang itangitertemi ULFA (Independent) züingsemtem iba tesemi aitogo aser Independence Day matong tsüingda tensa raksatsütsü asoshi jenjang balala agitsü atema parnok iba tesemi ait, ta osang agüja liasü.

Ketdangsürtemi ashiba agi, disposal squad tem iba tesemi ao aser parnoki bomb defuse süja liasü.

Brehotibarnüa Assam Rifles-i Changlang district kübok Namdapha National Park nung prangbong injang aser hadir aika nguteta liasü.

China-i Siang ayongbanglen dam ka yangluba süoki ia bilemer

Guwahati, Chiteni/July 20

(Agencies): China-i Honibarnü nungi Arunachal Pradesh den arrtsü anasa Tibet kübok Yarlung Zangbo ayong nung USD billion 167.8 intoka yanglutsü sentong aliba tzünokdang yanglu tenzüko.

Iba ayong dang ya Arunachal nung Siang ta ajar aser Assam nung Brahmaputra ta ajar.

Chinese Premier Li Qiang-i, Nyingchi yimti nung iba tzünokdang yanglu tenzüksü atema inyakyim tenzüksü liasü, ta official media sangdong ajanga metetdaksü.

Iba sentong ya Nyingchi indang Mainling hydropower station nung tzünokdang yanglutsü aliba tesem anasa agia liasü, ta Xinhua news agency-i metetdaksü.

Iba hydropower project koba alima nung project tulutiba ka asütsü ta züingshir, iba atema



India nung Arunachal Pradesh aser Assam aser Bangladesh nung ayonglanlen alirtemi kanga süoki ia bilemba lemsatepogo.

Iba project nung cascade hydropower stations pongu densema lir aser 1.2 trillion Yuan (approximately \$167.8 billion) intoka yanglutsü sentong lir.

2023 küm sangdong ka ajanga ashiba agi, iba hydropower station yagi küm nung electricity 300 billion kilowatt-hours adokdaksütsü, aser iba ajanga nisung million

300 atema küm nung power tenüingdakba peritsütsü.

Iba sentong nung National Development and Reform Commission aser Power Construction Corporation of China den iba tesem nung alirtemi shilem agia liasü.

Iba tzünokdang yanglutsü atema benokba sülen India nung Arunachal aser Assam nung ayonglanglen alirtemi iba ajanga parnok lobaliro dak kongshitsü ana nung aliba süoki ia bilemba lemsatepa arudar.

Manipur Police-i nisung apur asem apu

Imphal, Chiteni/July 20

(TYO): Manipur Police-i Honibarnü Bishnupur district nung Bishnupur District Police Station kübok Keirenphabi yimtsüing meita aoba mapang nisung apur asem apu aser parnoki pur aliba nisung ka kümzüka liasü, ta Deobarnü metetdaksü.

Osang balala ajanga, mejangjaba nisungtemi Bishnupur district kübok Ithai Bazaar nung alir Moirangmayum Khagemba Singh (24) pur aoba osang agütsüba sülen police-i tesem ka meita oa liasü.

Parnoki iba nisungba ya takok ngua kümzüko, shiba

item nisungtem yagi züka merenshiba sülen kanga mejungi yirur liasü.

Iba sülen ketdangsürtemi yirur alisang ya temang anepalutsü atema mozükidangi anir oa liasü, ta osang ajanga metetdaksü.

Meita aoba mapang police-i, Pukhao Iranpham nungi tang Moirang PWD Leirak nung alir Kojam Roshan Meitei (32), Sunusiphai Maka Leikai nung alir Haobijam Somokanta Singh (31) aser Phougakchao Ikhai nungi tang Moirang Lamkhair Relief Camp nung alir Kongjengbam Napoleon Singh (26) pua liasü. Parnok asemprongla ya Bishnupur

district nungi lir.

Ken o maneni bushisüingdangtsü aser temzüing ozüing dak ajemdaker jenjang tapet agitsü atema pua alirtem ya tapet police station nem agütsüogo.

Anogo ka tejakdang Manipur Director General of Police, Rajiv Singh-i Bishnupur district semdanga temzüing ozüing tensa asadanga ketdangsürtem den sensak asema den sepaitem ajungmesoa liasü. Ketdangsürtemi ashiba agi, pai District Police Officers, CAPFs, MPS probationers, OC, CDO aser women police personnel tem den senndn ayongzüka mena liasü.

South Korea tzü metsü ng aser alinen nung nisung 14 asü



Seoul, Chiteni/July 20 (Agencies): South Korea nung tzü nglu kanga sashia aruba ajanga alinen alua aser tzü metsü ng adokba nung nisung 14 süogo aser ano nisung 12 samar bushir ta ketdangsür temi ashir.

Gapyeong jila nung Deobarnü alinen alua ki kar anenbangba aser tzü metsü ng agi gari bonger aoba nung nisung ana asü aser pezü samar bushir ta sorkar ketdangsüri osangbener dang ashi.

Arishi küm 70 shi tain tetsür ka lar ki anenzüka aoba nung asü, aser ano arishi küm 40 shi

tain tebur temang ya tzü agi arakseta sür apu ka anasa ngutet, ta South Korea sorkar meyong Yonhap news agency ajanga ashi.

Seoul nungi anüdoklen kilometre 70 shi pilar Gyeonggi province nung Deobarnü tzü nglu 170mm (6.7 inches) jungnüa aru.

Ajisüaka asürtem ya timba Sancheong county nung atalok, kong Bodhbarnü nungi tzü nglu 800mm (31.5 inches) jungnüa arua liasü.

Deobarnep yangji search and rescue operations agiba mapang nisung tasü mang ana

ngutet, anungji nisung 33,000 aliba rural county nung asür nisung ti jungogo aser ano trok samar bushir.

Anasa Hapcheon county nung tzü nglu 699mm (27.5 inches) aser Hadong nung 621.5mm (24.5 inches) arua liasü.

Nisung 12 samar aliba nungi ana linük southwest tsütsü Gwangju yimti nungi lir, ta Yonhap ajanga ashi.

Lenmang metsü ng bangba, ali anenzüka aoba aser public facilities raksaba 1,920 aser ki o jen aser alu densema private property 2,234 raksaba züluoka lir ta ketdangsür temi Yonhap dang ashi.

Yimti tulu aser provinces 14 nung nisung 12,921 jenoka lir, ta ashir.

South Korea nung yimya agi meyi tzü nglu ya July ita nung arur aser iba mapang kanga junga renemer alir. Saka tan hopta linük south tsütsü tzü nglu khenyongi balaka arua aser ghonda shia asadangba nung tzü nglu tesashitiba tesem kar nungbo arua liasü, ta tzü ng sang-mopung data nung sayur.

Alima tzü-mopung melenba ajanga tzü ng sang-mopung tesashi ya timba aser tesashiba akumer ta scientists temi ashir. 2022 küm South Korea nung otsü yanglua tzü nglu arua tzü metsü ng adokba nung nisung 11 asü.

Russia indang Pacific tzükum anasa menoknok tesashi anak

Moscow, Chiteni/July 20 (Agencies): Pacific Tsunami Warning Center (PTWC) ajanga Russia indang Kamchatka Peninsula nung tsunami tzüsem asoshi lendong mali ta shiogo, kechiaser iba anasa tzüyim nung menoknok magnitude 7.4 tashi asemben ashitena anoka liasü.

Russia nung Pacific tzükum anasa menoknok anakba sülen tekum dangtsü ya Deobarnep agüja liasü, ta United States Geological Survey (USGS) ajanga ashi.

Menoknok ya Russia indang Kamchatka region yimtiba Petropavlovsk-Kamchatsky nungi anüdoklen kilometre 140 shi pilar anoka liasü. Petropavlovsk-Kamchatsky yimti nungya nisung 160,000 dak tema alir.

USGS ajanga ashiba agi, menoknok ya minute 32 tsü ngta Petropavlovsk-Kamchatsky tzükum nung tesem kasa nung anoka liasü.

Menoknok magnitude 7.4 ya 20km tarok nung anak. Tang tashibo nisung asü-amaba osang mali.

PTWC-i mezü ngbo tsunami tzüsem tulu adoktsü akok ta tekum dangtsü shia liasü, saka mapang tatsüla lir iba lendong adoktsü mapang süyigo ta ashi.

Menoknok tanabuba anogoba sülen Russia indang Emergencies Ministry ajanga tsunami warning agüja liasü aser tzükum anasa aliba nüburtem dang tzükum nungi pila alitsü ajungshia liasü.

Hawaii state asoshia 'tsunami watch' agüja aliba agienogo. Germany indang GFZ monitor-ia Deobarnü Kamchatka region anüdoklen menoknok ka magnitude 6.7 anakba jangja aser mapang tatsüka lir ibaji magnitude 7.4 liasü ta ashi.

Petropavlovsk-Kamchatsky ya Kamchatka region nung lir aser Pacific tzüyim len tejak shia lir aser ibai Japan northeast tsütsü aser US indang Alaska state anüolen Bering Sea alemer oa lir.

Kamchatka Peninsula ya Pacific aser North American tectonic plates ajurute pba tesem ka lir, anungji ibai seismic hot zone kum daktsür. 1900 sülen iba tesem nung menoknok magnitude 8.3 mesüra tema tenetben anoka lir.

November 4, 1952 nung menoknok magnitude 9 anoka Kamchatka nung teraksa jenti bener arutsü saka nisung asüba meliasü aser iba mapang Hawaii nung tzüsem metong nung 9.1-metre (30-foot) tashi atua liasü.

Japan nung election agir, PM Shigeru Ishiba asoshi tetendangba ka lir

Tokyo, Chiteni/July 20 (Agencies): Japan nung osettsüset jenjang tasakba akumba agi nüburtem tezü tangtepa aser US-i tariff meshitsü tejangja aliba mapang Deobarnü vote agütsütar.

Tang yimsü tesü dak Liberal Democratic Party (LDP) aser par junior coalition partner Komeito nati upper house nung overall majority agitettsü asoshi meyokteper menden 50 nüngdaker, saka tang tesüsa poll agiba nung parnoki aji metongtettsü amai sayur.

Ato Kilonser Shigeru Ishiba aser par ruling coalition asoshi mapang tamajung ka nung iba election ya agir, kechiaser US Tir Donald Trump-i tariff ken o jembiba mapang Tokyo nem tebilemtsü tulu agüja lir.

Japan nung gari yangluba industry tulu nung tariff meshiba ajanga kanga timtemtar, koba linük nung mapa shilem ti yangji lir.

Taoba hopta export data tashi maitba ajanga alima nung economy tulutiba jenjang pezü buba nung aliba linük ya technical recession-i aitsü akok ta tsübotepa liasü.

February ita Ishiba aser Trump na senden menaka, aser pa indang trade envoy Washington-i tenetben yokaka, tang tashi agreement kata



Shigeru Ishiba

meyangluteti lir.

Voters asoshi osettsüset nung jenjang tali akumba azüoktsü ya tongtipang tebilemtsü lir.

Japan nunger asoshi tongtipang chiyongtsü - jang - jenjang taoba küm dang anasü agi timba kumogo.

Jang agi anü ngba azüoktsü mechi ita ishika sorkari emergency stockpiles nungi agizüka amshitsüsa akum.

Taoba küm lower house election agiba nung coalition-i majority mongutetba sülen LDP dak voters temi temulung melemteter, shirnok taa (wages) timba makumer aser osettsüset nung jenjang tujen atur.

Kasa mapang populist Sanseito party kanga nüngtugu akumer, shirnoki lanurtem

puatsü asoshi social media amshir.

Par "Japanese First" yimyim yagi nüburtem mulungjang nung kanga junga kongshir. Iba party yagi immigration atema ozü ng tesashiba yangluner, "globalism" aser "radical" gender policies anemer aser decarbonisation aser vaccines indang tanaben bilemshidaktüner.

Ishiba'er ruling coalition yagi menden 50 ya mongutetra, parnok parliament indang chamber anaprong nung majority jenjang samatsü, aser pa lenisüba nung timtem ajurua yimtenren tashi meiti akumtsü.

Ishiba'er centre-right party yagi Japan nung 1955 nungi tanen makai amai yimsü süa arur, saka lenir dang melena arur.

Gaza nung teyari agitsü atar nisung 60 dak tema tepset

Gaza City, Chiteni/July 20 (Agencies): Gaza nung Palestine nunger tayari agitsü ataa alir njsung 67 tepset aser aika yiru, ta mozüki ketdangsür temi ashir.

Al-Shifa mozüki indang directori ashiba agi, tang tesüsa asüba ya Northern Gaza nung aliba Al-Sudaniya nung atalok.

Iba tesem nung aliba mozüki pezü dangi asü-amar aser yirur alirtem aika anir arur, aser Al-Shifa mozüki kisü ng nunga asü-amaba 45 liasü.

Tawa Palestine nunger noklang aika chiyongtsü aser teyari oset balala ataa alidang tepsetogo.

Honibarnü Gaza Strip kübok Teina area nunga nisung 30 dak tema tepset ta ashir.

Palestine nunger tesem balala nungi adenshia aliba central Gaza nung tesem balala nungi ainshitsü asoshi Israel mitkari Deobarnü totuyuba agütsüba sülen iba ya ataloker.

Mitkar temi ainshitsü totuyuba agütsüba tetetzü Deir al-Balah neighbourhoods amaktsü akok ta ajiteta Israel nunger pua bener oa aliba kinungertem temulung ani mesü ngzükteter, kechiaser parnok adianu aser kinungertem iba tesem nungya lir südi ta amanger.

Ita 21 dak tema raraba mapang Haza tesem ajak tamagitsü kumtsüogo aser yasa-

tzüra tali akumtsü tetsübo lir.

Gaza north tsütsü Al Shifa Hospital nung aliba ketdangsür temi ashiba agi, UN aid trucks aiba ataa adenshia alidak Israel-i injang khalotsüba nung Palestine nunger 30 tepset aser aika yiru. Israel indang mitkari iba report reprangshimba mapang lir ta ashir.

Chiyongtsü agi kanga anü ngba ajanga mang-manga aser anibe lema mozü kidangi aruba nisung noklang aika yakta asütsü, ta Palestine health ketdangsür temi ashir.

Deobarnü United Nations-ia civilian tem yaseter aser tangsa teyari nüngdaka lir ta ashi.

Israel mitkari southwest Deir al-Balah nung aliba district balala nung leaflets tsükdaktsüba nung yangji jenoka aloba Palestine nunger meyrirjang aika dang pei ki yutsür ano south leni aotsü totuyuba agüja liasü.

"Iba tesem nung tsükchir tashi aser kiralongrar indang ki o jen samatsütsü asoshi (Israeli) Defence Forces maneni tashi tulu nung lir aser tang raraba mapang item district temi mao," ta mitkar temi ashir.

Hamas-i iba tesem nung hostages tem yua alitsü südi ta temulung malemba ajanga army temi item tesem amaktsü nungnanger. Tang anü ngba aliba hostages 50 nungi 20 bo takum alitsü südi ta imlar.

Venus Williams DC Open nung asayatsü



Chiteni/July 20, 2025

(Agencies): Ita 16 sülen Venus Williams tang mezüngbuba asayamung ka nung asayatsü renemdar. Taoba mapang World No. 1 asayar ya DC Open nung asayatsü.

Williams tetsür kija asaya mezüngbuba round nung külem America tsür Peyton Stearns den asayatsü aser la tarep asaya nunga Hailey Baptiste den külemi asayaba angutsü. Arisih küm 45 tain Williams, shibai Grand Slam kija asaya tenet koker lir, la tatemsa 2024 küm March ita

Miami nung asaya liasü.

North American summer hard-court season ya Honibarnü WTA 500 DC Open atema main draw sangdongba sülen officially tenzükogo.

Taküm iba asayamung nung tetsür 28 tokteptsü, kong kija asaya nung Grand Slam koker aliba asayar pongu densema lir. Temaba jenjang nung aliba asayar pezü nem mezüngbuba round atema bye agütsüogo.

Asayamung nung World No. 4 Jessica Pegula No. 1 seed asütsü. Pegula-i la

indang career nung mezüngbuba WTA kija asaya Washington nung 2019 küm koka liasü.

Venus Williams tanabuba quarter nung lir, kong No. 3 seed Elena Rybakina-a densema lir, shiba nem bye agütsüogo aser la tanabuba round nung Victoria Mboko mesüra Anastasia Potapova na rongnung ka den asayatsü.

Denmark tsür Clara Tauson No. 4 seed asütsü aser la-a quarter pezübuba nung mezüngbuba round bye nguogo. Wimbledon nung junga asayaba sülen Tauson ya tang Top 20 nung lir.

Iba quarter tatem nung taoba mapang Top 10 asayar Danielle Collins Poland tsür No. 8 seed Magda Linette den mezüngbuba round asayatsü.

America tsürsa Emma Navarro No. 2 seed asütsü aser la tanabuba round nung Maria Sakkari mesüra Katie Boulter den asayatsü.

Iba quarter nung 2021 US Open champion Emma Raducanu mezüngbuba round nung No. 7 seed Marta Kostyuk den asayatsü.

Maneni Naomi Osaka mezüngbuba round nung Putintseva den asayatsü. Osaka aser Putintseva nati asaya asemsem koka lir, saka tatembangbuba asaya asembo Osaka-i koker lir.

Sulakshan Kulkarni Oman indang deputy head coach kümogo

Chiteni/July 20, 2025

(Agencies): Taoba mapang Mumbai wicketkeeper Sulakshan Kulkarni, Oman tebur cricket team deputy head coach asütsü shimogo.

Iba mapa atema Kulkarni shimba ya Oman Cricket-i Deobarnü social media ajanga metetdakja liasü. "Oman Men's National Team indang Deputy Head Coach ama onoki Sulakshan Kulkarni pelashishia agizüker. Pa coach tejen ka shibai domestic aser international jenjang nung tajangshiba bena lir. Onok tarutsü atema renemshiba mapang Kulkarni-i tajangshiba aika bener arutsü," ta Oman Cricket-i ashi

Taoba mapang Sri Lanka nung T20 World Cup atema Oman team qualify asütsü asoshi teyari agütsütsü atema lir. Oman nung October 8 nungi 18 tashi T20 World Cup Qualifiers ayongzüka asayatsü lir.

T20 World Cup Qualifiers team September ita asayatsü aliba Asia Cup atemabo Oman team qualify süatokogo, ajisüaka iba



sayamung ya asayatsü masayatsü mejangja aser Asian Cricket Council (ACC) taruba ita senden amenba sülenang jangjatsü.

"Kanga junga asaya aliba international team ka coach asütsüji maongka ka lir. Kü tajangshiba ajanga Oman cricket maneni renloka aotsü asoshi teyari agütsütsü imlar," ta Kulkarni-i TOI dang ashi.

Kulkarni ya taoba season Maharashtra Ranji team head coach liasü. Pa taoba mapang Mumbai, Tamil Nadu, Vidarbha, aser Chhattisgarh indang head coach liasü.

Tang agi tanabenbuba Oman Cricket-i national team atema India nung support staff asütsü shimogo. Küm ishika tejakdang parnoki Mumbai pacer Omkar Salvi, bowling coach asütsü shima liasü. Arisih küm 58 tain Kulkarni lenisüba nung Mumbai team season asem asayaogo aser parnoki 2012-13 season nung Ranji Trophy koka liasü.

Fraser aser Owen na Australia team nung züngoksemogo

Chiteni/July 20, 2025

(Agencies): Australia team West Indies den mezüngbuba Test asaya nung Jake Fraser-McGurk opener ama asayatsü. Hombarnü nü nungi tenzüka West Indies den T20I asaya pongu asayatsü aliba rongnung mezüngbuba asaya atema Australia team sangdongba nung Fraser züngoksema liasü. Asaya ya Sabina Park nung asayatsü.

Fraser-McGurk ya mezüngbo Caribbean tour atema asayar 16 shimba nung züngoksema maliasü aser menorang shim. Pa ya Spencer Johnson melena shimogo, shiba teberem nung timtem aliba ajanga masayatetsüsa kümogo.

Kasa mapang nung Mitchell Owen, shibai Hobart puri mezüngbuba Big Bash akokba nung tongtibang shilem agia liasü, pa tang mezüngbuba Australia team nungi middle order nung asayatsü.

West Indies den mezüngbuba T20I masaya tsüngda Jamaica nung training agiba mapang Short teberem

yiruba sülen pa kidangi meyipa yokogo.

Tim David, shiba taküm Indian Premier League nung Royal Challengers Bengaluru nungi asayaba mapang hamstring yirur anepaludar, ta mezüngbuba asaya atema anisüngzük agütsüogo aser pa melen Cooper Connolly tenetbuba nung batting amentsü.

Australia-i Travis Head, Alex Carey aser pacer Pat Cummins, Mitchell Starc aser Josh Hazlewood nung ajak iba asayamung atema anisüngzük agütsüogo aser iba ajanga taruba küm India aser Sri Lanka nung asayatsü aliba ICC Men's T20 World Cup atema team yanglutsü asoshi maongka agütsütsü.

West Indies den mezüngbuba T20I asaya atema Australia team:

Mitch Marsh (c), Jake Fraser-McGurk, Josh Inglis (wk), Cameron Green, Glenn Maxwell, Mitchell Owen, Cooper Connolly, Ben Dwarshuis, Sean Abbott, Nathan Ellis aser Adam Zampa.

Kyle Walker-Peters West Ham nung denogo

Chiteni/July 20, 2025

(Agencies): Defender Kyle Walker-Peters-i Southampton toktsüba sülen West Ham-i pa den tenangzüktepba ka yangluogo.

Arishi küm 28 tain full-back, shiba England team nung anaben asayar lir, pai West Ham den küm asem atema tenangzüktepba yangluogo.

"Ni pa ya asayar tajung ka ta züngshia aruogo aser ni aniba team tem den asayaba mapang pai teti kanga junga asayaogo," ta West Ham manager Graham Potter-i ashi.

"Pa temaba jenjang nung asayaba professional ka, shiba ajaki akümtsübuba Premier League asayar ka kümogo aser maneni kanga junga asaya aotsü anunga lir," ta paisa shisem.

Walker-Peters ya Tottenham nungi asaya-a tenzük aser 2020 küm January ita Southampton-i loan nung ao aser lemluwa iba club

den teti atema tenangzüktepba yanglua liasü.

Pa Southampton nungi 202 ben asayaogo, ajisüaka Southampton pur taoba season Premier League nungi relegated asüba den club den tenangzüktepba yanglur aliba tembangba sülen pai club toktsü.

Walker-Peters, Ole Gunnar Solskjaer-i aniba Besiktas team nung tatener dang liasü, saka Turkish club yagi Brestshiba ashiba agi, Walker-Peters-i medical tendangtsü atema menomeyangdaksüba sülen pa den tenangzüktepba yanglutsü kecha tejangraba mali.

"Ni Graham Potter den jembi aser ni iba telemtetba agiba ya iba dak tuluka keta

liasü," ta Walker-i ashi.

"Ni pa indang coach yimya sakloka aruogo aser iba yimya ya ni atema tapet asütsü ta amanger.

"Team ajaki takok marok kokner aser West Ham pura iba tejangraba lir. Graham den sensaksema mapang pai langka kanga tajungka yanglunüba shiogo aser nia iba nung shilem ka asütsü imlar," ta paisa shisem.

Taküm lemluwa West Ham-i Senegal defender El Hadji Malick Diouf, Slavia Prague nungi pound million 19 agi alizükogo aser defender Jean-Clair Todibo-a Nice nungi loan nung anir aruogo.

Parnokisa, winger Mohammed Kudus pound million 55 agi Tottenham dang yokogo.

BILEMDANGANG

"Azümesener asoshi mapa ajak tasak dang."